

## Evening Dogri News Bulletin,

23 May 2024 18:15 Hrs

### Headlines

- प्रधानमंत्री नरेंद्र मोदी होरें आखेआ ऐ जे भारत हाल दे किश बरें दौरान तेजिया कन्नै बदा'रदियां मुख्क अर्थ बवस्थाएं चा इक दे रूपै च उभरने च कामयाब रेया ऐ।
- लोकसभा चुनाएं दे 6में गेड़ दा प्रचार अज्ज मुकम्मल, वोट 25 मई शनिवार गी पाए जाडन।
- मौसम विभाग नै आखेआ ऐ जे जम्मू-कश्मीर च रातीं आहला तापमान बदने कन्नै अगले 6एं दिनें तगर हीट वेब यानि सख्त गर्मी आहली लैहर जारी रौहग।
- गौतम बुद्ध हुंदी जयंती बुद्ध पूर्णिमा देस-विदेश च मनाई जा'रदी ऐ।

<><><><><><>

### PM-Interview

प्रधानमंत्री ते भारतीय जनता पार्टी दे सीनियर लीडर नरेंद्र मोदी होरें आखेआ ऐ जे 2014 दे लोकसभा चुनाएं च भ्रष्टाचार ते 2019 च लाभार्थियों दा मुद्दा मुख्क हा ते 2024 आहले चुनाएं दा मुख्क मुद्दा विकसित भारत दा ऐ। अंग्रेजी इक्क अखबार कन्नै गल्ल कत्थ करदे होई उनें आखेआ जे देसै दी जनता इस लोकसभा चुनां गी महत्वै आहला मनदी ऐ की जे चुनां देसै दी आसें-मेदे दे रफ्तार कन्नै विकसित भारत दा लक्ष्य हासल करने लेई ऐ। श्री मोदी होरें दावा कीता जे इस बारी बी एम.बी.ए गी उनें वोटरें दा समर्थन थ्होग जिनें पिछले लोकसभा चुनाएं च समर्थन दित्ता हा। प्रधानमंत्री होरें गलाया जे इस बारी दे लोकसभा चुनां च भ्रष्टाचार बरोधी ते लाभार्थी मतदाता उंदे कन्नै ना। उनें गलाया जे भारत दे तेजिया कन्नै विकास दी तांग रखने आहला वर्ग उनेंगी ते भाजपा गी समर्थन देआ रदा ऐ। उनें गलाया जे बैंकिंग, प्रत्यक्ष विदेशी निवेश, नियमें दी अमलावरी, कारपोरेट टैक्स, इंकम टैक्स ते मौद्रिक नीति च सुधारें दे नतीजे च हुन भारत दुनिया दी 5मीं सब्बनें शा बड्डी अर्थ बवस्था बनी गेदा ऐ।

<><><><><><>

## Campaign 6<sup>th</sup> Phase

लोकसभा चुनावें दे 6में गेड़ लेई प्रचार अज्ज मकम्मल होई गेआ ऐ। इस गेड़ च 8 राज्यें ते केंद्र शासित प्रदेशें दिएं 58 सीटें पर औंदे शनिवार गी मतदान होग। इंदे च बिहार दियां 8, हरियाणा दियां सब्बनें 10 पार्लियामानी सीटां, झारखंड दी 4, दिल्ली दियां सब्बै 7, ओडिशा दियां 6, यू.पी दियां 14 ते पच्छिम बंगाल दियां 8 सीटें सनें जम्मू-कश्मीर दी इक संसदीय सीट शामिल ऐ। मतदान बडुलै 7 बजे रम्भ होइये संझा 6 बजे तगर जारी रौहगा। जम्मू-कश्मीर च अनंतनाग राजौरी संसदीय सीट लेई बी चुनावें प्रचार होरनें सीटें आंगर मुकम्मल होई गेआ ऐ। पिछले म्हीने चुनावें आयोग नै आखेआ हा जे आयोग नै खराब मौसम करियै इस सीट लेई मतदान दी तरीक गी 7 मई थमां बदलियै 25 मई करी दित्ता गेआ हा। इस सीट लेई 20 मेदवार मैदान च उतरे दे न पर मुख् मुकाबला पीडीपी प्रमुख महबूबा मुफ्ती, नेशनल कांफ्रेंस दे मियां अल्ताफ ते अपनी पार्टी दे जफर इकाल मन्हास बश्कार दस्सेया जा रदा ऐ। इस सीट च जम्मू दे कन्नोकन्नी कश्मीर दे रलाइये 18 विधानसभा हल्के शामिल न जिंदे च जम्मू दे 7 विधानसभा हल्के राजौरी, नौशहरा, बुद्धल, थन्नामंडी, सुरनकोट, पुंछ ते मेंढर शामिल ना।

<><><><><><>

## Migrant-Voters

तकरीबन 27 ज्हार विस्थापित कश्मीरी पंडित अनंतनाग-राजौरी पार्लियामानी सीट ताई वोट पाने लेई तैयार न जेदे पर 25 मई गी मतदान होना ऐ। इस सीट पर 18 विधानसभा इलाकें च सब्बनें शा मते वोटर ना। कुल 18 लक्ख 30 ज्हार 294 योग्य मतदाता न जिंदे चा 9 लक्ख 30 ज्हार 379 मर्द, 8 लक्ख 99 ज्हार 888 महिलां ते 27 किन्नर शामिल ना। चुनावें लेई तैयारियां जोरें-शोरें कन्नै जारी ना। विस्थापित मतदाताएं दी बद् ते महत्वै आहली गिनतरी गी ध्यानै च रखदे होई उंदी सहूलत ताई जम्मू च 21 मतदान केंद्र ते 8 होर दुए मदाद आहले केंद्रें गी खडेरेया गेदा ऐ।

<><><><><><>

## Div.Com

जम्मू दे डिविजनल कमिशनर रमेश कुमार होरें लोकसभा चुनावें दे 6में गेड़ तैहत 25 मई गी सरहदी जिले पुंछ च बी होने आहले मतदान दियें तैयारियें दी समीक्षा करने ताई कल जिले दा दौरा लाया। जिला पुंछ राजौरी-

अनंतनाग संसदीय सीट दा इक्क हिस्सा ऐ। जिला अधिकारियें कन्नै लग्गी दी बैठक दी प्रधानता करदे होई डिविजनल कमिशनर होरें वोट पोआने आहलियें टीमें गी भेजने, वापसी प उंदे कोला समेयान लैने आहले केंद्रें दी स्थापना, इस दौरान इस्तेमाल होने आहलियां गड्डियां ते होर दुए पहलुएं दी समीक्षा कीती। श्री रमेश कुमार होरें अधिकारियें गी निर्देश जा करदे होई आखेआ जे ओह सबबै तैयारियें गी पैहलें गै यकीनी बनाई लैना। तोआई मंडलायुक्त होरें जमीनी सतह पर तैयारियें दा जायजा लैने ताई स्ट्रांग रूम, चुनां सेल ते माडल मतदान केंद्र दा मौके पर निरीक्षण कीता। मतदान सरबंधी तैयारियें दे कन्नोकन्नी श्री रमेश कुमार होरें जिले च कनून बवस्था दी स्थिति ते सुरक्षा प्रबंधें दी बी समीक्षा कीती।

<><><><><><>

### CL-Employees

अनंतनाग राजौरी संसदीय सीट च मतदान करने लेई कश्मीर घाटी च कम्म करने आहले कश्मीरी विस्थापित कर्मचारियें ते जम्मू डिविजन दे कर्मचारियें आस्तै टकोह्दी कैजुअल लव दे समें च 24 मई थमां 26 मई 2024 तगर तरमीम कीती गेई ऐ।

<><><><><><>

### SANJAY

गांदरबल दे डीसी श्यामबीर होरें औंदी श्री अमरनाथ जी दी सालाना जात्तरा आस्तै सुरक्षा बवस्था पर बचार बमर्श करने ताई कल पुलिस, सेना, सी.आर.पी.एफ, बी.एस.एफ ते होर दुइयें सुरक्षा एजेंसियें दे अफसरें कन्नै इक्क सांझी बैठक लाई। बैठक च सुरक्षा कन्नै जुडे दे बक्ख-बक्ख पहलुएं पर विस्तार कन्नै गल्ल-कल्थ कीती गेई। डीसी होरें सुरक्षा ढांचे गी होर बी निग्गर करने ते यात्रुएं लेई अचूक सुरक्षा यकीनी बनाने लेई महत्वै आले सुझा दित्ते। श्यामबीर होरें यात्रा गी अमन-रमानदारी, सुचारू ढंग्गै सिर ते कामयाबी कन्नै करोआने लेई सरबंधत अफसरें बश्कार सक्रिय आपसी तालमेल पर जोर पाया। सुरक्षा बवस्थ तैहत होरनें महत्वै आहलियें थाहरें सने बालटाल बेस कैंप ते दोमेल पर टकोह्दे तौर पर चर्चा कीती गेई। डीसी हारें मुतल्लका सुरक्षा एजेंसियें गी निर्देश दित्ते जे ओह मुख्क शिविरें दी स्थापना लेई थाहरें गी खीरी शक्ल देने लेई बालटाल दा सांझा दौरा लाना।

<><><><><><>

## WeatherMan Heat Wave

मौसम विभाग मुजब जम्मू कश्मीर दे मैदानी इलाकें च अगले 6 दिन गर्मी दी लैहर चलने दा अनुमान ऐ। दस्सेया गेआ ऐ जे 23 मई थमां 28 मई तगर मौसम आम तौर पर खुशक बने दा रौहग, पर कुदे-कुदे गरज चमक कन्नै हल्की बूंदबांदी बी होई सकदी ऐ। 29 मई थमां 31 मई तगर बदल घनोए दे रौहने ते किश थाहरें हौली बरखा पौने ते बिजली कड़कने दी बी मेद ऐ। जम्मू ते कश्मीर दे मैदानी इलाकें च चला रदी गर्मी दी लैहर अगले 6 दिन होर रौहने दा अनुमान ऐ। मौसम विभाग नै लोकें गी धुप च निकलने लेई खबरदार कीता ऐ ते मती मात्रा च पानी ते तरल पदार्थ पींदे रौहने दी सलाह दिती ऐ, खास करियै कमजोर, बुजुर्ग लोकें ते बच्चें गी। तोआई रातीं दे तापमान च बी लगातार बाद्दा दर्ज होआ ऐ। श्रीनगर च कल घट्ट शा घट्ट तापमान 15 डिग्री सेल्यिस हा जदकि औदे शा पिछली रातीं दा तापमान 14 अशारिया 2 डिग्री सेल्यिस दर्ज कीता गेआ जेडा सामान्य कोला मता तापमान ऐ।



## School-Assemblies

जम्मू-कश्मीर स्कूल शिक्षा मैहकमे नै शैक्षणिक इदारें गी आखेआ ऐ जे ओहू गर्मी कन्नै सरबंधत बमारियें थमां बचा लेई दपैहरी सभाएं थमां परहेज करन। मैहकमे नै गर्मी कन्नै सरबंधत बमारी एच.आर.आई गी रोकने ताई इक्क दिशा-निर्देश च स्कूलें गी दपैहरी इयां लेया नेई करने दी सलाह दिती ऐ। एहदे अलावा स्कूलें गी पीने आले पानी ते पानी पीने लेई टकोहदा वक्फा करने लेई बी आखेआ गेआ ऐ। दिशा-निर्देश च आखेआ गेआ ऐ जे विद्यार्थियें गी अपना सिर खट्टने लेई बी जागरूक कीता जा।



## Budha Purnima

भगवान बुद्ध हुंदी जयंती दे तौरा पर बुद्ध पूर्णिमा अज्ज देसै दे बक्ख-बक्ख हिस्सें च मनाई जा रदी ऐ। एह पवित्र ध्याडा दुनिया भर दे बौद्धे आस्सेआ मनाया जंदा ऐ। एहू भारत, नेपाल, भूटान, बर्मा, थाईलैंड, तिब्बत, कोरिया, लाओस, वियतनाम, मंगोलिया, कंबोडिया, सिंगापुर, इंडोनेशिया ते श्रीलंका जनेय देसें च एहू मुख्क त्यौहार ऐ। राश्ट्रपति द्रोपदी मुर्मू ते उपराश्ट्रपति जगदीप धनखड़ होरें बुद्ध पूर्णिमा दे पवित्र मौके पर राश्ट्र गी शुभकामनां

दित्तियां ना। मुर्मू होरें अपने सनेअ् च आखेआ जे भगवान गौतम बुद्ध होरें इंसानियत ते सब्बै प्राणियें लेई सत्य, अहिंसा, आपसी भाईचारे ते हिरख-प्रेम दा सनेआ दित्ता ऐ। उपराश्ट्रपति जगदीप धनखड्ड होरें अपने सनेअ् च आखेआ जे भगवान हृदियां शिक्षां नैतिक आचरण, मानसिक अनुशासन ते ज्ञान च शामिल जीवन दी तपाश ताई इक्क परिवर्तनकारी खाका प्रदान करदियां ना।

<><><><><><>

### DGP-Greetings

बुद्ध पूर्णिमा दे पवित्र मौके पर जम्मू-कश्मीर पुलिस दे महानिदेशक आर.आर स्वैन होरें शहीदें दे परोआर आहलें, समर्पित पुलिस परिवार ते जम्मू-कश्मीर पुलिस आस्सेया सेवा प्रदान करने आहले समुदाय गी इस पवित्र ध्याड़े दियां शुभकामनां दित्तियां ना। डी.जी.पी होरें अपने स्नेअ् च आखेआ ऐ जे एहू दिन असें सब्बनें गी अमरन-शांति हिरख, प्रेम ते आत्म जागरूकता दे हमेशा बने रौहने आहले सिद्धांतें दा चेत्ता नोआंदा ऐ। भगवान बुद्ध दे महान सिद्धांत साढी बत्तै गी रोशन करदे रौहन ते अस सारे समाज दी भलाई ते तरक्की बाद्दे च अपना जोगदान देने दी कोश्ट करचे। श्री स्वैन होरें आखेआ जे बुद्ध हृदियां सिक्खेयां असेंगी सामे, लचीले ते बिजन स्वार्थ आहले हालात बक्खी लेई जंदियां न जेडियां पुलिस कर्मियें दे रूपै च अपने कर्तव्यें गी पूरा करने च महत्त्वै आह्लियां ना।

<><><><><><>

### ADGP-Greetings

बुद्ध पूर्णिमा दे पवित्र मौके पर जम्मू जोन दे ए.डी.जी.पी आनंद जैन होरें सब्बनें गी बधाई ते शुभकामनां दित्तियं नं अपने स्नेअ् च उनें आखेआ ऐ जे बुद्ध पूर्णिमा भगवान बुद्ध दे जरम, ज्ञान प्राप्ति ते महापरिनिर्वाण सने अमन, रमानदारी, दया ते ज्ञान आह्लियां उंदियां सिक्खेआं पर विचार करने दा समां ऐ। श्री आनंद होरें आखेआ जे बुद्ध हुंदे ज्ञान दी लौ असेंगी एकता ते आपसी भाईचारे कन्नै भरोचे दे भविक्ख बक्खी लेई जा।

<><><><><><>

## Export-Rise

देसै च पिले 18एं बरें दे मकाबले च चालू म्हीने च रोजगार ते निर्यात च रिकार्ड बाद्दा दर्ज कीता गेआ ऐ। एच.एस.बी.आई फ्लैश खरीददारी प्रबंधक सूचकांक पी.एम.आई मुजब भारत जुलाई 2010 थमां निजी क्षेत्र दे उत्पादन च त्री सब्बनें शा बद्द बाद्दे आह्ला देश बनी गेया ऐ। बिक्री ते उत्पादन दौनें मामलें च विनिर्माण क्षेत्र लगाता तरक्की करा करदा ऐ पर समग्र माली सशक्तिकरण दा मुख् कारण सेवा क्षेत्र दा मजबूत होना ऐ। सर्वे मताबक सकल निर्यात रिकार्ड बाद्दा होआ ऐ। मुल्लें दे मोर्चे पर इनपुट लागत च बाद्दे नै भारतीय चीजें-बस्ते ते सेवां ताई लैती जाने आह्लियें कीमतें गी होर बदाई दित्ता ऐ। एच.एस.बी.सी च भारत दे मुख् अर्थ शास्त्री प्राजुल भंडारी होरें आखेआ ऐ जे दौनें क्षेत्रें लेई निर्यात च बाद्दा होआ ऐ।

<><><><><><>